

Siunnersuummut oqaaseqaatit

Oqaaseqaatit nalinginnaasut**1. Aallaqqaasiut**

Imigassaq pillugu Inatsisartut Inatsisaat nr. 35, 23. november 2017-imeersoq maannakkut atuuttoq ukiuni kingullerni oqallisigineqartarsimavoq.

Allannguutissatut inatsit manna Naalackersuisunit saqqummiunneqartoq aalajangiiffigisassatut siunnersuutit sisamat, 2018-imi ukiakkut ataatsimiinnermi Inatsisartunit oqaluuserineqartut, tunngavigalugit suliarineqarpoq:

Aalajangiineq UPA 2018/52 imatut taaguutilik: *"Inuusuttut 18-t inorlugit ukiullit unnukkut nalunaaqutaq 20:00-p kingorna Cafèliarlutik kakaotorsinnaanngornissaat, sodavanditorsinnaanngornissaat assigisaannilluunniit najoqqaasinnaanngornissaat pillugu Imigassaq pillugu Inatsisartut Inatsisaanni § 20 imm. 4 atorunnaarsinnissaanut siunnersuuteqaqqullugit Naalackersuisut peqquneqarnissaanik Inatsisartut aalajangiiffigisassaattut siunnersuut."*

Aalajangiineq UPA 2018/53 imatut taaguutilik: *"Imigassaq pillugu inatsit allanngartinniarlugu siunnersuummik saqqummiusseqqullugit Naalackersuisut peqquneqarnissaanik Inatsisartut aalajangiiffigisassaattut siunnersuut, taamaasillutik niuertarfiit imigassanik aalakoornartortalinnik nioqquteqarsinnaalersillugit ataasinngornermiit arfininngornermut nalunaaqutaq 10:00-imit 20:00-ip tungaanut."*

Aalajangiineq UPA 2018/54 imatut taaguutilik: *"Imigassamut inatsimmi imigassat aalakoornartortalit pillugit pilerisaarutit suulluunniit inerteqqutaanerata atorunnaarsinnissaa imaluunniit allamik taama sakkortutigisumik taarserneqarnissaanut Imigassaq pillugu Inatsisartut inatsisaata allanngartinnissaanut allannnguutissamik saqqummiusseqqullugit Naalackersuisut peqquneqarnissaanik Inatsisartut aalajangiiffigisassaattut siunnersuut."*

Aalajangiineq UPA 2018/55 imatut taaguutilik: *"Imigassaq pillugu Inatsisartut inatsisaani § 28-p atorunnaarsinnissaanut siunnersuuteqaqqullugit Naalackersuisut peqquneqarnissaanik Inatsisartut aalajangiiffigisassaattut siunnersuut, taamaasilluni imigassaq nioqqutissanut allanut naleqqiullugu saagorsimajunnaartussanngorlugu."*

2. Siunnersuummi immikkoortut pingaarnerit

2.1 Meeqqat inuusuttullu 18-it inorlugit ukiullit sassaallertarfinniittarnerannut piffissaq sivitsorneqarpoq. Imigassaq pillugu inatsisikkut siunertaasimangilaq inuusuttut unnukkut cafémi kakaotorsinnaanerannik killersuinissaq, taakkunani isersimasut takussaasumik

qaqutiginnaq aalakoortarput. Aammattaarmi cafémi avatangiisit imerniartarfinni nalinginnaasunisulli inuusuttut immikkut illersugaanissaannik pisariaqartitsiviunngillat. Inatsisartut inatsisaanni sassaallertarfiit qanoq paasineqarnissaannik nassuiaatini imerniartarfiit caféllu akornanni immikkoortitsisoqanngim- mat, inuusuttut ilagineqarnatik sassaalliteqartarfinni isersimasinnaanerannut t aalajangersakkami piffissarititaasoq nal. 20:00-miit nal. 23:00-imut sivitsorneqassasoq siunnersuutigineqarpoq. Immikkut ittumik oqaaseqaatit innersuussutigineqarput.

2.2 Pisiniarfiit imigassamik tuniniaanermut ammasarfiinik sivitsuineq

Siunnersuummi matumani piffissat ammasarfiit imatut sivitsorneqarput imigassamik aalakoornartulinnik pissusissaatut akuersissummik pigisaqarluni tuniniaaneq ataasinngornermiit arfininngornermut nal. 10:00-miit 20:00-mut pisinnaanngorlugu. Taamaaliortoqarpoq nunatsinni innuttaasut pisiniarfiliarnerminnut atatillugu periarfissarissaarnerulernissaat siunertaralugu.

2.3 Imigassamik aalakoornartortalinnik ussaassaaruteqarnissap inerteqqutaaneranik maannakkut atuuttumik atorunnaarsitsineq Imigassaq pillugu Inatsisartut Inatsisaat nr. 35, 23. november 2017-imeersukkut imigassat aalakoornartullit ussaasarutigineqaqqusaajunnaarput. WHO-p Imigassaq pillugu Europami Nalunaarutaa aallaavigalugu atuutilersitsisoqarpoq, tassanimi allassimammat meeqqat tamarmik avatangiisiminni imigassamik nittarsaassinermut illersugaallutik alliaartorsinnaatitaasariaqartut. Ilaatigut taamaaliortoqarsinnaavoq nittarsaassinarluni iloriusissianut imigassamik atuilernissamut ukiukillisaaqataasunut meeqqat inuusuttullu ingalassimaartinnerisigut taamatullu inuusuttut nalinginnaasumik imigassamik atuinikinnerulersinnerisigut.

Aalajangiiffigisassatut siunnersuuteqarnermut tunngavilersuutigineqartut ilagaat meeqqat inuusuttullu nittarsaassinarluni iloriusissianut ingalassimaartinniarlugit tamakkiisumik inerteqquteqarneq siunertarineqartut siuliini taaneqartut akuersaarnissaannut ingasappallaartoq. Taamatuttaaq tunisaqarsinnaanermut tunngatillugu siuarsaanissamut periarfissat pitsaannerusut kissaatiginartinneqarput najukkani nioqutissiarineqartut ataatsimoortumik isigalugit. Taamaammat inerteqqut siunnersuummi matumani atorunnaarsinneqarpoq. Taamaalillutik nioqutigisat ilisarnaataanik ilanngussisannginnissaq qanoq paasinninnissamut apeqquterpassuarnik pilersitsisoq aammattaaq inatsimmi ilaajunnaarpoq. Imigassamik aalakoornartortalinnik nittarsaassinermut tunngatillugu tuniniaanissamik nittarsaassinermut inatsit innersuunneqarpoq, ingammik inatsimmi nittarsaassinermi pitsaasumik ileqqoqarnissaq kiisalu meeqqanut aamma inuusuttunut tuniniaanissamut nittarsaassinert saaffiginnittuni ileqqorissaarnissamut maleruaqqusat innersuussutigineqarput.

2.4 Imigassat assersorneqarsimanissaat pillugu piumasaqaammik atuuttumik atorunnaarsitsineq

Imigassaq pillugu Inatsisartut Inatsisaat nr. 35, 23. november 2017-imeersukkut pisiniarfiit pisussaaffilerneqarput pisiniarfimmi imigassat aalakoornartullit nioqqutissanit allanit immikkoortisimaneqassasut. Taamaaliortoqarpoq kissaatigineqarmat imigassat takussaanerat annikillisinneqassasooq. Siunertaavoq inuiaqatigiinni imigassamik atuinerup taamaalillunilu imigassamik pissuteqartumik malitsigisaasunik sunniutaasartut annikillisinneqarnissaat. Maannakkut allanguutissatut siunnersuutikkut pisiniarfiit imigassamik aalakoornartulinnik tuniniaaviusunik iluarsisimanissaannut taamatut piumasaqaat atorunnaarsinneqarpoq.

2.5 Paasissutissanik ingerlatitseqqinnissamut periarfissaliissut

Inatsisartut Inatsisaanni § 32, imm. 1-imi politiit inerteqquteqarnissaminnut periarfissinneqarput. Inerteqqut taanna piviusumik atuutsinniarneqarnera ajornakusoorsimavoq, taamaattumik politiinut periarfissaliissut ilanngunneqarpoq inuk pineqartorpiaq inerteqquteqarfigineqarsimasooq pillugu paasissutissanik ingerlatitseqqissinnaanermut.

Inatsisissatut siunnersuut inatsimmut atuuttumut sanilliullugu	
Oqaasertaasut maanna atuuttut	Inatsisissatut siunnersuut
	§ 1 Imigassaq pillugu Inatsisartut Inatsisaat nr. 35, 23. november 2017-imeersumi uku allangortinneqassapput:
§ 20 imm. 4: <i>Imm. 4.</i> Nal. 20:00-ip kingorna inuusuttut 18-it inorlugit ukiullit sassaallertarfinnut imigassanik aalakoornartulinnik sassaallertartunut iseqqusaassanngillat angajoqqaaminnit, nakkutiginnittuminnit imaluunniit inummik allamik oqartussaassusilimmit inuusuttumut immikkut akisussaasumit ilagineqanngikkunik. Akuersissummik pigisaqartup aamma taassuma sulisuisa pisussaaffigaat nakkutigissallugu inuusuttup 18-it inorlugit ukiullip pissusissamisoortumik ilagineqarnissaa."	1. § 20 imm. 4 imatut oqaasertalerneqassaaq: " Nal. 23:00-ip kingorna inuusuttut 18-it inorlugit ukiullit sassaallertarfinnut imigassanik aalakoornartulinnik sassaallertartunut iseqqusaassanngillat angajoqqaaminnit, nakkutiginnittuminnit imaluunniit inummik allamik oqartussaassusilimmit inuusuttumut immikkut akisussaasumit ingiaqateqanngikkunik. Akuersissummik pigisaqartup aamma taassuma sulisuisa pisussaaffigaat nakkutigissallugu inuusuttup 18-it inorlugit ukiullip pissusissamisoortumik ingiaqateqarnissaa."
§ 25. Imigassanik aalakoornartortalinnik tuniniaaneq pisinnaavoq ataasinngornermit tallimanngornermut nal. 09.00-imit 18.00-imit aamma arfininngornermi nal. 10.00-imit 14.00-imit.	2. § 25, imm. 1 imatut oqaasertalerneqassaaq: " Imigassanik aalakoornartulinnik tuniniaasoqarsinnaavoq ataasinngornermiit arfininngornermut nal. 10:00-niit 20:00-mut."
<i>Imigassap ussasaarutigineqartarnera</i>	3. § 26 kingornatigut immikkoortup qulequtaa atorunnaarsinneqarpoq.

<p>§ 27. Imigassat aalakoornartortallit pillugit ussassaarineq, allagarsiussineq allatulluunniit ussassaarineq inerteqqutaavoq.</p> <p><i>Imm. 2.</i> Tamatumunnga taarsiullugu meqqit, saqqarmiuusat, ilisarnaatit takussutissalluunniit allat atuisup imigassanik aalakoornartulinnut tunngassuteqartutut paasisinnaasai atornerisigut inerteqqut avaqqunneqaqqusaanngilaq. Tamannali suliffeqarfiup ilisarnaataanut atuutinnngilaq.</p> <p><i>Imm. 3.</i> Imigassanik aalakoornartulinnik akeqanngitsumik agguaneq inerteqqutaavoq.</p> <p><i>Imm. 4.</i> Niuertarfinni sassaalliisarfiillu iluini assiaqusersorsukkami ussassaarisinnaaneq imm. 1-imi aamma 2-mi inerteqqummut ilaatinneqanngilaq.</p> <p><i>Imm. 5.</i> Tusagassiorfiit nunanit allaneersut imm. 1-imi aamma 2-mi inerteqqummut ilaatinneqanngillat.</p>	<p>4. § 27, atorunnaarsinneqarpoq.</p>
<p><i>Pisiniarfinni imigassanik aalakoornartortalinnik assiaqusersuisarneq</i></p>	<p>6. § 27 kingornatigut immikkoortup qulequtaa atorunnaarsinneqarpoq.</p>
<p>§ 28. Imigassat aalakoornartortallit tamarmik pisiniarfimmi pisiassanit allanit assiaqusersorsimassapput.</p> <p><i>Imm. 2.</i> Pisiniarfinni imigassat aalakoornartortallit assiaqusersorneqarnissaat inissisimaffissaallu pillugit maleruagassanik sukumiinerusunik Naalakkersuisut aalajangersaasinnaapput.</p>	<p>7. § 28, atorunnaarsinneqarpoq.</p>
<p>§ 32. Politiit inuit, sassaalliisarfimmi isersimanerminni pinerluttuliornermik iliuseqarsimasut sassaalliisarfinni aalajangersimasuni isersimasinnaanerit inerteqqutigisinnaavaat.</p> <p><i>Imm. 2.</i> Taamatuttaaq sassaalliisarfimmi pissutsit immikkut ittut pissutigalugit meeqqat inuusuttullu</p>	<p>8. § 32-mi <i>imm. 2</i> kingornatigut <i>immikkoortut</i> nutaat 3-5 ilanngunneqassapput:</p> <p>” <i>Imm. 3.</i> Paasissutissat politiinit imm. 2 tunngavigalugu ingerlateqqinneqartut taamaallaat piginnittunit, aqutsisunit aamma matulerisunit oqaluuserineqarsinnaapput, taamaattorli tak. imm. 4,</p>

<p>isersimanissaat naleqqutinngippat politiit sassaalliisarfiit peqqusinnaavaat 18-it inorlugit ukiulinnik isersimasoqartassanngitsut.</p>	<p>oqaluuserinninnerlu taamaallaat pisinnaavoq imm. 1 naapertorlugu inerteqqutigineqartup atuutsinneqarnissaata pisariaqarnera tunngavigalugu.</p> <p><i>Imm. 4.</i> Piginnittut, aqutsisut aamma matulerisut nipangiussisussaataapput paasissutissanut imm. 2-mi taaneqartunut tunngatillugu. Tamanna taamatutaaq atuuppoq inunnut imm. 5 naapertorlugu aalajangersakkat aalajangersarneqarsimasut kingunerisaannik paasissutissanik pineqartunik oqaluuserinnittussanngortitaasut. Pinerluttulerinermi inatsit §§ 50 – 54 taamatutaaq atuuppoq.</p> <p><i>Imm. 5.</i> Taamatutaaq Naalakkersuisut maleruaqqusanik aalajangersaasinnaapput paasissutissat imm. 3-mi taaneqartut oqaluuserineqarnissaannut tunngatillugu, tamatumunnga ilanngullugit paasissutissat pineqartut inunnit allanit, imm. 3-mi taaneqartut saniatigut, oqaluuserineqarsinnaanerannut tunngatillugu.”</p>
<p>43. Pillaammik akiliisitsinermik pineqaatissiisoqassaaq uku unioqquatinneqarpata § 3, imm. 1, § 7, imm. 1, § 8, § 11, imm. 1, § 15, imm. 1, § 16, § 17, § 18, § 19, imm. 1 aamma 2, § 20, § 21, § 22, § 23, § 24, § 25, § § 26, imm. 1, 2, 3 aamma 4, § 27, imm. 1 aamma 3, § 28, imm. 1 § 29, § 30, § 31, imm. 1 aamma 2, § 34, aammattaaq § 37. Taamatutaaq pillaammik akiliisitsinermik pineqaatissiisoqassaaq § 32-p malitsigisaanik inerteqqummik unioqqutitsisunut kiisalu § 35, imm. 1-ip aamma § 36, imm.1-ip malitsigisaanik peqqusummik malinnikkumanngitsunut.</p>	<p>9. § 43-mi, <i>imm. 1</i> peerneqarpoq § 27, <i>imm. 1</i> aamma 3, § 28, <i>imm. 1,</i>”.</p>
	<p>§ 2</p>

	Inatsisartut inatsisaat inatsisip tamanut saqqummiunneqarnerata aqaguani atuutilissaaq.
--	---

3. Pisortanut aningaasaqarnikkut allaffissornikkullu kingunerisassai

Naatsorsuutigineqarpoq siunnersuutip imigassap tunisaanerata annertuseriarnera kingunerissagaa taamaalillunilu akitsuutitut tunngassuteqartuni pisortanut isertitaqarnerulissutaassalluni. Taamatuttaaq imigassartornerulerup inooriaatsimik pissuteqartumik nappaatinut taamatullu pinngitsuuisinnaajunnaarnermut katsorsaarnermut aningaasartuutitut atatillugu suli aningaasartuuteqarnerulerneq kingunerissavaa. Tamakku saniatigut siunnersuut inunnik isumaginninnermut tunngassuteqartuni tuniluuttumik sunniuteqassasortaaq naatsorsuutigineqarpoq.

4. Inuusutissarsiortunut aningaasaqarnikkut allaffissornikkullu kingunerisassai

Siunnersuut imigassanik tunisaqarnerulerneq, inuusutissarsiortunut kaaviiartitsinerulerneq kinguneqartumik, kinguneqassasoq naatsorsuutigineqarpoq. Siunnersuutikkut pisiniarfiit imigassamik tuniniaanerannut piffissamik sivitsuisoqarmat, aammattaaq arfininngornikkut, tamanna sassaallertarfiit isertitamikkut annaasaqaatigissavaat. Tamakku saniatigut tunisaqarnerusalernissaq naatsorsuutigineqarpoq, imigassanik aalakoornartortalinnik nittarsaassinissamut periarfissap atuuteqqilernerata malitsigisaanik. Tamatuma unammilleqatigiinnermik siuarsaanerunissaa naatsorsuutigineqarpoq.

Pisiniarfinni imigassamik tuniniaaneranut ammasarfiit sivitsorneqarneratigut angerlarsimaffinni imigassaliortarnerup imigassamillu akuerineqarnani tuniniaasarnerup annikilleriarnerannut iluaqutaassasoq naatsorsuutigineqarpoq, pisiassarmi atuisartumut ajornannginnerusumik pineqarsinnaalissamat.

5. Avatangiisinut, pinngortitamut inuillu peqqissusaannut kingunerisassai

Naatsorsuutigineqarpoq siunnersuut imigassap tunisaanerulerneq kinguneqassasoq taamaalillunilu inuit peqqissusaannut pitsaanngitsumik sunniuteqarluni. Imigassanik aalakoornartortalinnik atueriaaseq ajortup tungaanut sunniuteqarfigissavaa ilaatigut pinngitsuuisinnaajunnaarikkut tamatumalu malitsigisaanik sunniuttutigit takuneqarsinnaasumik, assersuutigalugu inunnik isumaginninnermut tunngassuteqartuni.

6. Innuttaasunut kingunerisassai

Assiaqusersuinissamik aamma ussasaarinnermik inerteqquteqarnerup atorunnaarsinneqarneratigut imigassat aalakoornartortalit nittarsaanneqaqqilersinnaassapput, tamatumalu kingunerissavaa niuerfimmi unammillernermik siuarsaaneq aamma akitiqinneqartut sunniuteqarfigineqassapput.

Taamaattumik naatsorsuutigineqarpoq siunnersuutip kingunerissagaa imigassamik aalakoornartortalimmik tuniniaanerup annertusinissaa aamma akikinnerusumik, tassami imigassat aalakoornartortallit saqquminerulissapput aamma innuttaasumit pissarsiariuminarninngorlutik. Imigassamik atuinerulerneq inuiaqatigiinni inuuniarnikkut pissutsini takuneqarsinnaalissaaq.

7. Kingunerisassai pingaarutilit allat

Siunnersuut pingaarutilinnik allanik kinguneqassasoq naatsorsuutigineqanngilaq.

8. Oqartussaasunik suliniaqatigiiffinnik allanillu tusarniaaneq

Siunnersuut piffissami 18.12.2018-miit 21.01.2019-mut tusarniaassutigineqarpoq ukununnga:

Namminersorlutik Oqartussani naalakkersuisoqarfinnut tamanut, Peqqissutsimut Pinaveersaartitsinermullu Aqutsisoqarfinnut, Allorfimmut aamma ukununnga Kommuneqarfik Sermersooq, Kommune Kujalleq, Qeqqeta Kommunua, Kommune Qeqertalik, Avannaata Kommunua, Pinerlutsaaliuinermut Siunnersuisoqatigiit, Nunatta Nakorsaaneqarfia, Nunatta Eqqartuussisuuneqarfia, Kalaallit Nunaanni Eqqartuussiviit, Kalaallit Nunaanni Naalagaaffiup Sinniisoqarfia, Sulisitsisut, KNI, Pisiffik, Brugseni, Kalaallit Nunaanni Politiit, Meeqqat pisinnaatitaaffii pillugit sullissivik MIO, Imigassaq ikiaroomartullu pillugit Siunnersuisoqatigiit, Kalaallit Nunaanni Timersortartut Kattuffiat.

Tamakku saniatigut siunnersuut Naalakkersuisut tusarniaassutigisaminnut nittartagaanni piffissami tassani pissarsiarineqarsinnaasimavoq.

Tusarniaanermut akissuteqaatit 16-it tiguneqarput, taakkunanga uku oqaaseqaateqarsimanatik: Aatsitassanut Suliffeqarnermullu Naalakkersuisoqarfik, Ineqarnermut Attaveqaqatigiinnermullu Naalakkersuisoqarfik, Mittarfeqarfiit, Kalaallit Nunaanni Naalagaaffiup Sinniisoqarfia, Kommune Kujalleq, Peqqissutsimut Pitsaaliuinermullu Aqutsisoqarfik, Qeqqata Kommunua.

Tusarniaanermut akissutit uku siunnersuummut oqaaseqaatinik imaqarput: Inuussutissarsiornermut Nukissiuuteqarnermullu Naalakkersuisoq, Kalaallit Nunaanni Eqqartuussiviit, Nunatta Eqqartuussisuuneqarfia, Kalaallit Nunaanni Politiit, Kommuneqarfik Sermersooq, Pisiffik, Kalaallit Nunaanni Sulisitsisut, Imigassaq ikiaroomartullu pillugit Siunnersuisoqatigiit, Meeqqat illersuisuat, MIO.

Tulliuttumi tusarniaanerup nalaani tusarniaanermut akissuteqaatit allannguutissatullu siunnersuutit tiguneqartut suliarineqarput. Tusarniaanermut akissuteqaatit oqaasertai tamaasa

ilanngullugit orlingasunngorlugit allanneqarput. Taakkua ataanni Naalakkersuisut taakkununga oqaaseqaataat ilanngunneqarput.

Kalaallit Nunaanni Eqqartuussiviit:

Kalaallit Nunaanni Eqqartuussiviit Imigassaq pillugu Inatsisartut Inatsisaat nr. 35/2017 allanngortinneqarnissaanut siunnersuutigineqartunut oqaaseqaatissaqanngilaq.

Taamaattorli naalakkersuisoqarfimmut malugeqquneqarpoq § 43, taassuma nassiunneqartuni allanngortinneqarnissaa siunnersuutigineqanngimmat.

§ 43, imm. 1-imi pisinnaatitsissutigineqarpoq inatsimmi § 28, imm. 1-imi unioqquitsineq akiliisitsinermik pineqaatissineqarnermik kinguneqassasoq.

Allannguutissatut § 28-imi siunnersuutigineqartoq naapertorlugu § 28, imm. 1-imit innersuussineq isumaarutissaaq. Inatsimmi § 43, imm. 2-mi pisinnaatitsissuteqareerpoq najoqqutassatigut tamatuma malitsigisaanik - § 28, imm. 1-imi allanngortinneqartumi – aalajangersaasoqarsinnaasoq, najoqqutassamik unioqquitsineq akiliisinneqarnermik pineqaatissinneqarnermik kinguneqassasoq.

Akissuteqaat:

Naalakkersuisut oqaaseqaatigineqartut tusaatissatut tiguaat.

Nunatta Eqqartuussisuuneqarfia:

Nunatta Eqqartuussisuuneqarfiata Kalaallit Nunaanni Eqqartuussiviit inatsimmi § 43-mi iliuuseqarfigineqarnissamut aalajangersakkat pillugit oqaaseqaataat taperserpaat.

Tamatuma saniatigut Nunatta Eqqartuussisuuneqarfia inatsisissatut siunnersuummut oqaaseqaatissaqanngilaq.

Akissuteqaat:

Kalaallit Nunaanni Eqqartuussivinnut akissuteqaat takuuk.

Kommuneqarfik Sermersooq:

Aningaasaqarnermut Inussutissarsiornermullu Ataatsimiititaliap allannguutissatut siunnersuut ataatsimiititaliap 14. Januar 2019 ataatsimiinnermini oqaluuseraat. Ataatsimiititaliap siunnersuummut oqaaseqaateqarpoq imaattunik.

Inuussuttut sassaalliteqartarfinnut isersimasinnaanerisa sivitsorneqarnera Allannguutissatut siunnersuummi § 20, imm. 4-mi takuneqarsinnaavoq nal. 23.00-ip kingornatigut inuit 18-it inorlugit ukioqartut sassaalliteqartarfinnut imigassanik

aalakoornartortalinnik sassaalliuteqarfiusartunut iseqqusaassanngitsut, tamatuma kingunerisaanik inuusuttut isersimasinnaanerat nal. 20.00-imit 23.00-imut sivitsorneqarpoq.

Inatsisartut Inatsisaanni imaluunniit allannguutissatut siunnersuummi imerniartarfiiit aamma cafeet assigiinngissutaanik immikkoortitsinngimmata, allannguutissatut siunnersuutip maannakkut oqaasertaliornermigut inuusutut (15-18-inut ukioqartut) ammaappa ingiaqateqartinneqarnatik nal. 23.00-ip tungaanut imerniartarfinniissinnaanerat, taakkunanilu annertuumik imigassartortoqartarluni. Kommuneqarfik Sermersuumit erseqqissaatigineqarusuppoq cafeet aamma imerniartarfiiit assigiinngissutaasa erseqqissumik immikkoortinneqarnissaat, taamaaliornikkut inuusuttut cafeeni isersimasinnaanerat malinneqassammat, illuatungaanik imerniartarfinnut isersinnaanerat suli killeqartinneqassalluni.

Pisiniarfinni nioqquteqarnissamut ammasarfiiit sivitsorneqarnerat Allannguutissatut siunnersuummi § 25, imm. 1-imi takuneqarsinnaavoq imigassamik nioqquteqarnermi ammasarfiiit sivitsorneqassasut ataasinngornermit – arfininngornermut nal. 10.00-imit - 20.00-imut. Aningaasaqarnermut Inuusutissarsiornermullu Ataatsimiititaliami amerlanerussuteqartut neriutigaat ammarsarfiiit sivitsorneqarnerat ajunngitsumik sunniuteqarumaartoq imigassanik aalakoornartortalinnik nioqquteqarneq nalunaaquttap akunnerinut ammasarfiusunut siammarnersammat. Ikinnerussuteqartut allannguummot isumaqataaangillat.

Ussassaaruteqarnermik inerteqquteqarnerup qasukkarneqarnera allannguutissatut siunnersuummi § 27, imm. 4 aamma imm.5 takuneqarsinnaavoq ussassaaruteqartarnermik inerteqquteqarneq qasukkarneqassasoq. Aningaasaqarnermut Inuusutissarsiornermullu Ataatsimiititaliami amerlanerussuteqartut maannakkut ussassaaruteqarnermut inerteqquteqarnerup qasukkarneqarnissaa ajunngitsutut isigaat. Ikinnerussuteqartunik inassutigineqarpoq ussassaaruteqarnermik inerteqqutip atorunnaarsinneqavinnissaa.

Assiaqusersuineq

Allannguutissatut siunnersuummi takuneqarsinnaavoq nioqqutissat imigassanik aalakoornartortallit assiaqusersorneqarnissaannik piumasaqaat atorunnaarsinneqassaaq. Aningaasaqarnermut Inuusutissarsiornermullu Ataatsimiititaliami amerlanerussuteqartut allannguutissatut siunnersuut taperserpaat aamma kissaatigalugu niuertarfiiit namminneq aalajangissagaat assiaqusersuissanerlutik.

Imigassaq pillugu inatsisip atuutilersinneqarneranut aamma allannguutinut suliarineqarneranut tunngatillugu Kommuneqarfik Sermersuumit erseqqissaatigineqarusuppoq Imigassaq pillugu Inatsisartut Inatsisaat nr. 35, 23. november 2017-imeersoq naleqqutinngitsumik suliarineqarsimasoq. Inatsit 1. marts 2018 atuutilerpoq najukkanilu inuusutissarsiutinik ingerlatsisunut annertuumik kinguneqarluni aningaasartuutaalluni, ilaatigut sanaqqinnernut

aningsartuutunik. Inatsisartut taamak pilertortigisumik inatsimmi qitiulluinnartunik allannortitsinera inuussutissarsiuutunik ingerlatsisut akornanni toqqissisimanninnermik pilersitsissaaq ilaatigut siunissami aningaasaliissuteqarnissamut inatsisitigut piunasaqaataasinnaasunut tunngatillugu.

Akissuteqaat:

§ 20 imm. 4 inatsimmik atuuttumik ingerlatitseqqinneruvoq. Allannguutissatut siunnersuummi matumani piffissaq taamaallaat allanngortinneqarpoq. Imerniartarfiit aamma cafeet suunerisa immikkoortinneqarnerat ilanngunneqanngilaq, naak Naalakkersuisunit Kommuneqarfik Sermersuumit isummersuutigineqartut isumaqatigineqaraluartut, taamatut immikkoortitsinissaq naleqqutissagaluartoq. Naalakkersuisunit kissaatigineqarpoq akuersissutini suussutsit assigiinngitsut sapinngisamik ikittuinnaassasut, tassani eqqarsaatigineqarpoq ataatsimoortumik takunnilluarsinnaaneq aamma akuersissutunik pigisaqartuusinnaasunut tunngatillugu. Tamanna tunngavigalugu immikkoortitsinissaq kissaatigineqartoq periarfissaqanngilaq akuersissutunik tunniussaqtartarnermi periuseq allanngortinneqartinnagu, tassani oqariaaseq atorneqartoq tassaaginnarmat sassaalliteqartarfiit.

Tamatuma saniatigut malugeqquneqarpoq inatsimmi atuuttumi § 32, imm. 2, tassani politiinut pisinnaatitsissuteqarpoq sassaalliteqartarfirmut inerteqqutigissallugu 18-it inorlugit ukioqartunik isersimatitsinnginnissaanut aammattaaq § 20, tassani pineqarpoq imigassanik aalakoornartortalinnik inunnut 18-it inorlugit ukioqartunut pisitsitsineq imaluunniit sassaalliteqarneq inerteqqutaasoq.

Naalakkersuisut isumaqatigaat inuussutissarsiuutunik ingerlatsisut pisariaqanngitsumik artukkertinneqassannginnerat inatsisip akuttunngitsumik nutarterneqartarneranik pissuteqartumik. Naak taamaakkaluartoq Naalakkersuisut isumaqarput allannguutit pisariaqartuusut.

Kalaallit Nunaanni Politimesteri:

Peqqissutsimut Naalakkersuisoqarfiup Imigassaq pillugu Inatsisartut Inatsisissaannut (imigassamut inatsit) allannguutissatut siunnersuummut Kalaallit Nunaanni Politiinit oqaaseqaatit noqqaassutigisimavai.

Aallarniutigalugu oqaatigineqassaaq tusarniaanermut akissuteqaat sapinngisamik oqaasertalersussasoq Kalaallit Nunaanni Politiini politimesteriusup Bjørn Bayp imigassaq aalakoornartortalik pillugu Inatsisartut inatsisissaannut nutaamut siunnersuummut 16. maajimi 2017-imeersumi oqaaseqaatai aallaavigalugit.

Inatsisissatut siunnersuutit oqaaseqaatit makku tulluuttut saqqummiunneqarnissaannut peqqutissaqartitsivoq:

Oqaaseqaatit nalinginnaasut

Kalaallit Nunaanni Politiit isumaliutigeqqaat inatsisip allanngortinneqarneratigut qulartoqalernissaa inatsisip qanoq paasineqarnissaanut atatillugu mianerisassat suunissaannut tunngatillugu.

Maannakkut atuuttumi inatsimmi oqaaseqaatini nalinginnaasuni allassimavoq imatut, inatsisip siunertarigaa innuttaasut peqqissuunissaannut pilersaarutip Inuuneritta II-p tapertalerneqarnissaa meeqqat inuusuttullu atornerluilernissaannik pinaveersaartitsinikkut kiisalu imigassamik aalakoornartortalimmik sapinngisamik annikillisaasoqarnissaa. Ilaqutariinnut aamma Peqqissutsimut Ataatsimiititaliami amerlanerpaartaasut isumaliutissiisummi Inatsisartuni aappasaanik siunnersuutip eqqartorneqarnerani saqqummiunneqartumi allappaat inatsisip siunertarigaa imigassamik aalakoornartortalimmik atornerluinissamik pinaveersaartitsinissaq, immikkullu pingaartillugu meeqqanut inuusuttunullu kingunerisassai ajortut.

Imigassaq aalakoornartortalik pillugu allannguutissatut siunnersuummi nassiunneqartumi tassunga aklerliittunik allassimasoqarpoq, siunnersuutip kingunerissagaa imigassamik aalakoornartortalimmik annertunerusumik tunisaqartoqarnissaa innuttaasullu peqqissusiat pitsaanngitsumik sunnerneqassasoq naatsorsuutigineqartoq.

Inatsisissatut siunnersuummi aalajangersakkanut ataasiakkaanut oqaaseqaatit:

Imm. 2-mut

Malittarisassat erseqqissuunissaat assigiiaartuunissaallu qulakkeerniarlugu Kalaallit Nunaanni Politiit siunnersuutiginiarpaat inuup 18-it inorlugit ukiullip ingiaqateqarnani sassaalliuteqartarfimmu qaqugukkut isersinnaatitaaneranut piffissap nal. 24.00-imut aalajangersaavigineqarnissaa. Taamatut qulakkeerniarlugu sapinngisamik ilaatigut sassaalliuteqartarnissamut akuersissuteqartunut, innuttaasunut aamma oqartussaasunut inatsisunik atortussaatisisunut inatsisip ajornaatsuunissaa. Tassunga atatillugu malugeqquneqarpoq piffissat nal. 24.00 aamma nal. 03.00 sassaalliuteqartarnermut tak. § 26 aalajangersakkani allani pineqarmata.

Imm. 5-imut

Kalaallit Nunaanni Politiit paasinninnerat malillugu aalajangersakkami taakkununnгалu ilaasuni oqaaseqaatini siunnersuutigineqartuni oqaaseqatigiiliornerni erseqqissuliornerunnгilaq inatsimmi piumasaqaataasup naammassineqarnissaanut naammattumik "teknikkut assersuinerup" qanoq killeqarnissaa. § 27-mut imm. 4-mut oqaaseqaatini uku tulluuttut allassimapput:

"Taamaammat pisariaqarpoq ataasiakkaat tamakku ujarlerfigisassagaat teknikikkullu sillimmartaarutit atorlugit qulakkeerineqataaffigalugu quppernениk ujaasisut 18-inik ukioqalereersimanissaa. Attaveqaatini taamaattuni pingaaruteqarportaaq imigassanut aalakoornartortalinnut ilanngullugu nioqqutissanik allanik ussassaarisooqartannгinnissaa

taamatutaaq pingaartumik nioqqutissanik meeqqanut sammisitanik assersuutigalugu imeruersaatiniik.”

Allassimangilaq teknikimut assersuinerit sorliit iliuuserineqassasut inatsisip siunertaanik naammassinninniaranni. Pinerluuteqarnermut inatsisimmi § 1-imi tamatumunnga tunngasoq pillugu iliuusereqqusaasunut erseqqissumik inatsisitigut periarfissaliisoqarnissaa piumasaqaataammat maannakkut oqaaseqaatini oqaaseqatigiit tunngavigalugit teknikikkut iliuuserisat qanoq ikkaluarpataluunniit naammattuusorinarpoq. Soorlu assersuutigalugu nittartakkami imaluunniit Facebookimi attaveqaaqatigiinnermut boksi taamaallaat tooraanni 18-it qaangerlugit ukioqartuuneq akuerisassaasarpoq.

Imm. 6-imut

§ 27-mi imm. 5-imi siunnersuutigineqarpoq pilerisaarisarnissamut periarfissaqarnissaa, tamanna ataasiakkaanik annikitsunik nioqquteqartartup iniutaani aamma sassaalluuteqartarfimmi. Inatsisissatut siunnersuummi oqaaseqaatini allassimavoq Inatsisartut inatsisaat maannakkut atuuttuusoq tassuunakkut ingerlateqqinneqartoq. Aalajangersakkamili nutaami annertuumik allannguuteqartoqarpoq siunissami aalajangersakkap atuutsinnissaanut ajornartorsiortitsisussamik.

Maannakkut inatsisitigut aalajangersaasoqarpoq ataasiakkaanik annikitsunik nioqquteqartartuni immikkut assersukkami pilerisaarinerup pisarnissaa taamaallaat inerteqqutaanngitsoq. Allannguutissatut siunnersuummi tamanna allanngortinneqarsimavoq ataasiakkaanik annikitsunik nioqquteqartartup iniutaani pisusanngorlugu. Taamaammat erseqqinngilaq aalajangersagaq imm. 1-imisut atuarneqassanersoq, tassani inerteqqutaammat ussassaarutiniik nivinngaavinni illoqarfimmi saqqumisuni ussassaaruteqartarnissaaq, tak. inatsisissatut siunnersuummi oqaaseqaatitit. Taamaalilluni soorlu assersuutigalugu ataasiakkaanik annikitsunik nioqquteqartartup igalaavini aqqusinermi takuneqarsinnaasuni imaluunniit niuertarfimmi tamarmi tamanut saatsillugit ussassaaruteqartarnissaata inerteqqutaanera qularutigineqarsinnaassaaq. Tamatuma saniatigut ussassaarutit niuertarfeqarfimmi allanik niuertarfeqarfiusumi inerteqqutaannginnera aammattaaq apeqquteqarfineqarsinnaassaaq, taamaalillunilu ”ataasiakkaanik annikitsunik nioqquteqartartup iniutaasa angusinnaasaanni”.

Aammattaaq oqaatigineqassaaq Kalaallit Nunaanni Politiit isumaqarmata - innuttaasut, oqartussaasut suliffeqarfii illu malittarisassanik malinnittussat eqqarsaatigalugit - nittarsaassineq pillugu maleruagassat Kalaallit Nunaanni Namminersornerullutik Oqartussat inatsisiliarisimasaanni allassimagunik naleqqunnerussasoq (Tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisaat nr. 39, 9. december 2015-imeersoq (tuniniaanissamik nittarsaassisarnermut inatsit).

Tamatuma qulakkiissavaa pilerisaarineq pillugu maleruagassat immikkut oqartussaasunit

pilersaarineq pillugu immikkut inatsimmik ilisimasaqarluartunit nakkutigineqarnissaat (Atuisartoqarnermut Unammilleqatigiinnermullu Aqutsisoqarfik), soorlu aamma naleqqunnerusussaasoq pilersaarinermit inatsisitigut maleruagassanik nakkutilliisoq oqartussaasumit nakkutigineqassappat.

Kalaallit Nunaanni Politiit taamaattumik siunnersuutigissavaat pilersaarineq pillugu aalajangersakkat pilersaarineq pillugu inatsimmi ataatsimoortilernissaat maannakkut pineqartumi immikkut inatsimmi allassimanatik - § 27-mi imigassamik aalakoornartortalik pillugu inatsimmut allannguummi.

Inaarutaasumik oqaaseqaatit

Kalaallit Nunaanni Politiit sassaalliuteqartarnissamut akuersissuteqartartussanik pilersitsisoqarnissaa eqqarsaatigeqqinneqarnissaa kissaatigaat. Tassuunakkut pineqartumut ataatsimut iliuuseqartarnissaq pitsaanerulersinneqassaaq, suliatigut pikkoriffeqartumik aamma oqartussaasut aamma suliatigut tunngasut akimorlugit sinniisoqartumik akuersissuteqartartussanik peqarpat. Kalaallit Nunaanni Politiit paasinninnerat malillugu imigassamik aalakoornartortalimmik aamma kommunini ataasiakkaani pinerluuteqarnissamut pinaveersaartitsiniarluni suliniarneq tamatuma tapersissavaa, sassaalliuteqartarnissamut akuersissuteqartartussanik najukkani ataasiakkaani ilaasortalimmik peqarpat, najukkani ataasiakkaani amerlanerussuteqartunit ilaasortalik aamma nuna tamakkerlugu soqutigisaqartunik.

Naggataatigut Kalaallit Nunaanni Politiit malugeqquniarpaat maannakkut inatsimmi § 32-mi imerniartarfimmiititsinissamut inerteqquteqarnissamut periarfissaq. Aalajangersakkap tamatuma kissaatigineqartutut kinguneqarluarniassammat pisariaqassaaq sassaalliuteqartarnissamut akuersissuteqartumik ilisimatitseqateqarnissaq kina taamatut inerteqquteqarfigineqarnersoq. Kalaallit Nunaanni Politiit paasisaat malillugu paasisutissanik taamaattunik ilisimatitseqatigiittarnermi erseqqissumik inatsisitut periarfissaqarnissaa piumasaqaataavoq, aamma imigassaq aalakoornartortalik pillugu inatsimmi imaluunniit allanik inatsisiliornerni taamatut periarfissiisoqanngilaq. Taamaattumik siunnersuutigerusunnarpoq aalajangersakkami ilanngunneqassasoq politiit paasisutissanik piginnittunut aamma aqutsisunut ingerlatitseqqiisinaanerat, inuit kikkut suliffeqarfimmi pineqartumiissinnaanerminnik inerteqquteqarfigineqarsimanersut kiisalu paasisutissat politiit ingerlateqqitaat taamaallaat sassaalliuteqartarnissamut akuersissummik piginnittunit, aqutsisunit aamma matulerisunit sularineqartarnissaat inerteqqutip atortinnissaanut pisariaqartinneqartumut naammaginartumik.

Akissuteqaat:

Allannguutissatut siunnersuutigineqartut aamma Inatsisartut inatsisaata nassuiarnissaanut naleqqutinnginnerannut atatillugu Naalakkersuisut taamatut isiginninnermut isumaqataapput. Kalaallit Nunaanni Politiit siunnersuutaanni § 20 imm. 4-p piffissaq taaneqartoq nal. 24.00-

inngortillugu allanngortinnissaa maannakkut allannguutissatut siunnersuummi ilanngunneqanngilaq Inatsisartut EM 2018/52-imi aalajangiussami akuersissutigimmassuk piffissaq nal. 23.00-imut allanngortinneqassasoq.

Tusarniaanermut killiliussap kingornatigut tusarniaanermut akissuteqaatit takkuttut tunngavigalugit Naalakkersuisut aalajangerpaat ussasaaruteqarnissamut inerteqquteqarneq qasukkaanermut taarsiullugu atorunnaarsinneqassasoq, Kalaallit Nunaanni Politiit nittarsaassinerup erseqqissaavigineqarnissaa pillugu eqqarsaataat ilanngunneqanngillat. Tamatuma saniatigut Naalakkersuisut Kalaallit Nunaanni Politiit eqqarsaataannut isumaqataapput imigassaq aalakoornartortalik pillugu nittarsaassisarnerup ataatsimut nittarsaassisarnermut inatsimmi aaqiivigineqarnissaat tulluurtuunerusoq.

Sassaalliuteqartarnissamut akuersissuteqartartunik pilersitsinissamut siunnersuut ilanngunneqanngilaq. Maannakkut pineqartumi siunnersuutip avataaniippoq sassaalliuteqartarnermut aaqqissuussinerup allanngortinneqarnissaa, taavalu innersuussutigineqarlutik Inatsisartut inatsisaannut oqaaseqaatit.

Kalaallit Nunaanni Politiit sassaalliuteqartarnermik inuit kikkut inerteqquteqarfigineqarsimanersut pillugit ilisimatitsissutinik akuersissummik peqartumut ingerlatitseqqittarnissamut kajumissaarutaata tusaatissatut tiguneqarpoq. § 32 imm. 1-imi inerteqqummik tunisinissamut akuersissutip piviusumik suliarineqartassappat nalilerneqarpoq pisariaqartutut kina inerteqqummik tunineqarsimanersaq pillugu ilisimatitsissummik Kalaallit Nunaanni Politiit sassaalliuteqartarnissamut akuersissummik pigisaqartumut ingerlatitseqqittarnissamut. Tamatumunnga innersuussutigineqarput immikkut ittumik oqaaseqaatigineqartut.

Imigassaq ikiaroornartullu pillugit Siunnersuisoqatigiit:

Imigassaq Ikiaroornartullu pillugit Siunnersuisoqatigiit Imigassaq pillugu Inatsisartut Inatsisaata nr. xx. xxx 2019 allannguutissatut siunnersuutip tusarniaassutigineqarneranut akissuteqaataat.

Imigassaq Ikiaroornartullu pillugit Siunnersuisoqatigiit tusarniaanermut nassiunneqartumut qujapput. Siullermik Imigassaq Ikiaroornartullu pillugit Siunnersuisoqatigiit ataatsimut isigilluni akissuteqarniarpoq, tamatumalu kingornatigut immikkoortunut ataasiakkaanut.

Allannguutissatut siunnersuutininut ataatsimoortumik:

Imigassaq Ikiaroornartullu pillugit Siunnersuisoqatigiit tunngaviusumik isumaqarput Imigassaq pillugu Inatsisartut Inatsisaata meeqqat inuusuttullu illersorneqarnissaannik siunertaqassasoq. Kisianni Imigassaq Ikiaroornartullu pillugit Siunnersuisoqatigiit allannguutissatut siunnersuutip tunngavigalugu naatsorsuutigaat tamatuma kingunerissagaa imigassamik aalakoornartortalimmik tunisaqarnerup annertusinissaa, tassa imigassamik

aalakoornartortalimmi pissarsisinnaaneq annertusineqarmat. Nunani tamalaani misissuisarnerit takutippaat imigassaq pillugu inatsisip qasunganerusup kingunerisaraa imigassamik atuinerulerneq. Siunnersuisooqatigiit isumaqatigaat allannguutissatut siunnersuutit pissarsiarinnissinnaanerup annertusinerata aamma erseqqinnerulersitsineq inuiaqatigiinnut amerlanerusunik aningasartuuteqarnissaq kingunerisagaa, nappaatit inooriaatsimik pissuteqartut, inuttut atugarisatigut kinguniusut, pinngitsuuisinnaanermik katsorsartinneq, persuttaaneq, pinerluinniarneq il.il. Inatsimmi allannguutit taakkua meeqqaanut inuusuttunullu iluaqutaanngillat, akerlianilli niuertarfiit iluaquserneqassapput isertitaqarnerulernermikkut. Imigassaq pillugu Inatsisartut Inatsisaannik maannakkut atuuttumik akuersissuteqarneq inuit peqqinnerulernissaannut alloriarneruvoq pitsaasoq, akerlianik Inatsisartut Inatsisaannut allannguutissatut siunnersuutit inuit peqqinnerulernissaannut, tamatta angorusullugu sulissutiginiakkatsinnut, kingumut allariarnerusinnaavoq.

Eqqaamasariaqarparput suli meeqqat inuusuttullu atugarissaanngitsut amerlammata qitiusumik pinaveersaartitsinermik iliuuseqarnermut, soorlu maannakkut imigassaq pillugu Inatsisartut Inatsisaat assersuutaasoq meeqqat inuusuttullu ukiukippallaarlutik imigassamik aalakoornartortalimmik atuilernissaannut, imigassamik atuivallaarnissaannik aammattaq atornerluisunnngornissaannut pinaveersaartitsinermut ilaasinnaagaluartoq. Inatsisip maannakkutut innermisut peroriartorfimmit kingornussat pitsaanngitsut pinaveersaartissinnaavai.

Imigassaq Ikiaroornartullu pillugit Siunnersuisooqatigiit tunngaviusumik isumaqarput imigassaq pillugu Inatsisartut Inatsisaata allanngortinneqarnissaa siusippallaartoq. Inatsit ukiuni arlalinni atuutsinneqartariaqaraluarpoq taamaattoqarneratigut imigassaq pillugu inatsisimmi pinaveersaartitsinermut iliuuserineqartut sunniutai pillugit uppernarsaasorsorluakkanik suliaqartoqarsinnaagaluarpat, tamakkulu tunngavigalugit inatsimmik allanngortitsisoqarsinnaassagaluarpat.

§ 2 imm. 8: ” Inuusuttutut 18-it inorlugit ukiulittut paasineqassapput inuit 15-init 18-inut ukiullit.”

Imigassaq Ikiaroornartullu pillugit Siunnersuisooqatigiit nuannaarutigaa siunnersuisooqatigiit innersuussinerat tusaaniarneqarsimammat tassa qassinik ukioqarnerup killilerneqarnissaanik, tassa 15-inik ukioqalereersimasoqassaaq inersimasumik inuusuttumut akisussaasuumik ingiaqateqartinnani sassaalliteqartarfimmiissagaanni.

§ 20, stk. 4: “Nal. 23:00-ip kingornatigut inuusuttut 18-it inorlugit ukiullit sassaalliteqartarfinnut imigassanik aalakoornartulinnik sassaalliteqartunut iseqqusaassanngillat angajogqaaminnit, angajogqaatut akisussaasumik imaluunniit inummik allamik inersimasutut oqartussaassusilimmit inuusuttumut immikkut akisussaasumit ilagineqanngikkunik. Akuersissummik pigisaqartup aamma taassuma sulisuisa pisussaaffigaat

nakkutigissallugu inuusuttup 18-it inorlugit ukiullip pissusissamisoortumik ingiaqateqarnissaa."
 Taamaattorli Imigassaq Ikiaroornartullu pillugit Siunnersuisoqatigiit aarleqqutigaa massakkut
 inuusuttut 15-it aamma 18-it akornanni ukioqartut sassaalliteqartarfinnut tamanut
 ammaasiisoqarnera, cafeenuinnaangitsoq inatsimmik allanngortitsinermi
 siunertaasimagaluartumit.

Tamatuma kingunerissavaa inuusuttut 15-inik ukioqalereernerminni
 imerniartarfinniissinnaalissapput inunnut taamak inuusutsigisunut naleqqutinngitsuni.
 Tamatuma ajornerpaamik kingunerisinnaavaa inuusuttut imerniartarfinnukartartut,
 imerniartarfinniittarnermik ulluinnarni nalinginnaasumik inuunerup ilaatut isiginnilerlutik.

Inatsit sapinngisamik annertunerpaamik sunniuteqassappat pingaaruteqarpoq inuit, inatsimmit
 anguniarusutat (matumani pingaarnertut inuusutut, taakkua angajoqqaavi aamma niuerfik),
 aammattaaq oqartussaasut malitsitsiniartussat – ilanngullugit politiit – ulluinnani
 ajornangitsumik eqqaamasinnaassavaat maleruaqqusat suunersut. Taamaattumik
 pingaaruteqarpoq inatsimmi ataatsimi piffissat assigiinngitsut pisariaqartitsineq
 tunngavigalugu arlallit atorneqannginnissaat. Piffissat matusinissamut tunngasut uani
 marlooreerput, tassalu nal. 24.00 aamma 03.00 cafeet pineqartillugit. Taamaattumik Imigassaq
 Ikiaroornartullu pillugit Siunnersuisoqatigiit inassutiginiarpaat inuusuttut isersimasinnaanerat
 aammattaaq na. 24.00-imut inissinneqassasoq. Taamaaliornikkut piffissat eqqaamasassat suli
 marluinnaassapput, allannguutissatut siunnersuummi siunniunneqartutut pingasuunerannut
 taarsiullugu. Tamanna politiinut ilaatigut paatsiveerunnanginnerussaaq unnuakkut
 nakkutilliillutik angalaarneranni. Tassami taakku unnuami nalinginnaasumi ilaatigut
 maleruaqqusanut arlalinnut isummertartussaapput, soorlu eqqartuussisarnermut inatsit,
 pinnerluttulerinermi inatsit, politiit maleruaqqusaat, aqqusinermi angallannermi inatsit,
 neriarniartarfinnut inatsit aamma imigassaq pillugu inatsit.

3. § 25, imm. 1: "Imigassamik aalakoornartulinnik tuniniaasoqarsinnaavoq ataasinngornermiit
 arfininngornermut nal. 10.00-imiit 20.00-imut."

Imigassaq Ikiaroornartullu pillugit Siunnersuisoqatigiit akueraa WHO-mit inassutigineqarmat
 pissarsisinnaanermut periarfissat annikinnerusut aamma takussaanginnerulersitsineq
 pinaveersaartitsinermit aaqqissuussatut sakkusaasut, taakkualu imigassamik
 aalakoornartortalimmik atuinermik annikillisisinnaasut kiisalu meeqqat inuusuttullu
 siusinaartumik atuisunngornissaannik kinguartitsisinnaasut.

Siunnersuisoqatigiit isumaqarput imigassamik pisinissamut ammasarfiit sivitsorneqarpata taava
 tamatuma kingunerissagaa innuttaasut akornanni imigassamik atuneq annertusissasoq.
 Ingammik siunnersuisoqatigiit aarlerissutigaat arfininngornermi siviisuumik ammasarfik.
 Piviusumik tamatuma kingunerissavaa niuertarfinni piffissami siviisunerusumi "imagassamik
 aalakoornartortalimmik akikinnerusumik pisisoqarsinnaanera",
 imerniartarfinni/neriniartarfinni pisarineqarsinnaasunut sanilliussilluni. Ammasarfiit

sivisunerusut aamma imigassaq akikinnerusoq pissutsit taakkua marluk tamarmik kingunerissavaat nioqquteqarnerup aamma atuinerup annertusinerat. Tamanna ingammi meeqqanut aamma inuusuttunut ilaqutariinni atornerluinermik ajornartorsiuteqarfiusuni sunniuteqassaaq, tassami periarfissaqalissammat piffissami sivisunerusumi ammasarfinni imigassamik pisinissaq, taakualumi sassaalliteqartarfinit akikinnerupput angerlaanneqarsinnaallutik imerniartarfinni imernejarnerannut taarsiullugu.

Allangortitsinermut siunertarineqarpoq innuttaasut imigassanik pisiniarsinnaanermut atatillugu eqaannerusumik periarfissinneqarnissaat, matulernerup nalaani amerlasuut siuleriiaartarnerisa pinngitsoortinneqarnissaat. Imigassaq Ikiaroornartullu pillugit Siunnersuisoqatigiit taarsiullugu siunnersuutiginiarpaat imigassamik aalakoornartortalimmik nioqquteqartarnerup sivitsorneqarneranut taarsiullugu, piffissap imigassamik nioqquteqarfiusup nikisinneqarnissaa. Ulluinnarni nal. 11-20 arfininngornikkullu 11-15. Tamatuma kingunerissavaa Kalaallit Nunaata WHO-p inassuteqaataanik malinnissaa, tassa imigassap pissarsiarineqarsinnaaneramik annikilliliineq, taamaaliornikkullu nioqquteqarneq aamma atuneq pinaveersaartillugu tamatumunnga ilutigitillugu matulernerup nalaani siuleriiaartoqartarnera pinngitsoorlugu.

5. § 27, imm. 4 ”Imm. 1-imi aamma 2-mi inerteqqutaagaluartoq suliffeqarfuit internetimi suliffeqarfuit matoqqasunik nittartagaanni imigassanik aalakoornartortalinnik nittarsaassisinnaapput. Imatut tunitsivissarsiortoqassaaq qupperneq matoqqasoq taamaallaat imigassanik aalakoornartulinnik imaqartillugu.”

Imigassaq Ikiaroornartullu pillugit Siunnersuisoqatigiit piumanerussagaluarpa maannakkut inatsimmi ussassaaruteqarsinnaanerup inerteqqutigineqarnerata allangortinneqannginnissaa, tamatumanimi siunertaammat meeqqat inuusuttullu ussassaarinermut illersorneqarnissaat. Tamatuma saniatigut uppernarsaasersuilluni nunani tamalaani misissuinerit takutippaat meeqqat inuusuttullu imigassamik aalakoornartortalimmik ussassaarinermik sunnerneqartartut, siusinerusukkut imigassartortalertartut aamma annertunerusumik imigassartortartut, meeqqanut inuusuttunullu imigassaq pillugu ussassaarutinit sunniuteqarfigineqartanngitsunut naleqqiullugit.

Imigassaq pillugu ussassaarinerit imigassamik pisisarneq siuarsartarpaat taamaangippammi ussassaaruteqarneq isumaqassanngikkaluarpog. Imigassaq pillugu ussassaarineq meeqqanik inuusuttunillu aamma inunnik imigassamik pinngitsuuisinnaajunnaarsimasunik eqquinngitsumik ajornarpoq, naak taamaaliornermi anguniakkat tassaagaluartut atuisartut imigassamik silappaarissumik atuisartut anguniarneqaraluartut.

Tamanna oqaatigeriarlugu Imigassaq Ikiaroornartullu pillugit Siunnersuisoqatigiit nuannaarutigaat allannguutissatut siunnersuummi pineqarmat ussassaaruteqartarnerup qasukkarneqarnissaa aamma imaangitsoq ussassaaruteqartarnermik inerteqquteqarnerup taamaativinnissaa. Suliffeqarfuit nittartagaasigut matoqqasutigut nittarsaassinikkut, taava

meeqqat inuusuttullu 18-it inorlugit ukiullit tusagassiorfiit aamma aallaaviit allat aqputigalugit nittarsaassinernik eqqorneqassanngillat.

Taamaattorli Imigassaq Ikiaroornartullu pillugit Siunnersuisoqatigiit inassutiginiarpaat nioqputissat neqeroorutaasut ussassaarutigineqartannginnissaat, taakkua inunnik imigassanik amerlasuunik pisititsinermik kinguneqassammat, tamannami siunertaanngikkaluarmat. Akerlianik niuertarfiit ussassaarutigisinnaavaat imigassat niuertarfinni ataasiakkaanik suut pisiarineqarsinnaanersut.

Taamaattorli Imigassaq Ikiaroornartullu pillugit Siunnersuisoqatigiit aarleqqutigisinnaavaa elektroniskiusumik attaveqaatit nunat killeqarfii qaangerlugit atorneqartartut eqqarsaatigalugit najukkaniittunut naapertuilluartumik inerteqquteqartoqarsinnaanersoq, tassami nunani allani imigassaliortartut soorunami nioqputigisatik nittarsaassinnaavaat, akerlianik najukkaniittut allannguutissatut siunnersuut manna malillugu taamaaliorsinnaanatik.

§ 27, imm. 5. "Imm. 1-imi aamma 2-mi inerteqqummut ilaanngilartaaq ussassaarineq pisiniarfiup initaani aamma sassaallertarfiup initaani pisoq aalakoornartortaata procentia apeqqutaatinnagu."

Imigassaq Ikiaroornartullu pillugit Siunnersuisoqatigiit tapersersunngilaat niuertarfinni imigassanik aalakoornartortalinnik ussassaarisinnaanerup ammaananeqarnissaa. Tamatuma kingunerisinnaavaa pisisartut taakkununga ilaallutik meeqqat inuusuttullu imigassanik aalakoornartortalinnik ussassaarutinik sunnerneqassallutik niuertarfimmut isernermininngaanniit. Niuertarfiit periarfissinneqassapput soorlu assersuutigalugu ussassaaruteqarsinnaapput soorlu neqaarniarfimmi imatut allassimasumik "Nerisassanut viinnisinissat eqqaamaviuk".

Tamatumunnga ilutigitillugu niuertarfiit ammaananeqassapput imigassat pillugu aviisinik neqeroorutiliornissaminut tamakkulu pisisartumik angerlaanneqarnissaat periarfissaalluni.

Oqaaseqaatini nittarsaassinermut inatsit innersuussutigineqarpoq nittarsaassinermi aamma piseqqusaarinermi ileqqorissaarnissaq meeqqat aamma inuusuttut eqqarsaatigalugit. Kisianni soorlu siusinnerusukkut oqaatigineqartoq imigassat pillugit ussassaarinermi inersimasunut sammisuugaluartuni meeqqat inuusuttullu sunningitsoorneqarsinnaanngillat.

Allannguutissatut siunnersuut manna inatsimmut ilanngunneqarpat pingaaruteqarpoq ussassaarutit taakkua qanoq ilusilersorneqarnissaannut maleruaqqusanik suliaqartoqarnissaa. Soorlu assersuutigalugu pujaasap assinga qanoq angitigissava, pujaasap assinga inuit ilanngunnagit kisimi takutinneqassava, ussassaarummi taamaallaat nioqputip suunera allaaserineqassava. Tamatumani pineqarpoq imigassap saqqumilaarnerata annikillisinniarnera.

§ 27, imm. 7. "Imigassat aalakoornartullit ussassaarutigineqarnerat imigassap saniatigut sunniutigisartagai taamatullu pinngitsuuisinnaajunnaarneq sumi pisinnaanersoq pillugit paasisstissanik ilaqartinneqartassaaq."

Tamanna Imigassaq Ikiaroornartullu pillugit Siunnersuisoqatigiit tapersersuinnarsinnaavaat. Siunnersuutigineqarpoq oqaasertat aamma assiliartat pillugit maleruaqqusanik suliaqartoqassasoq, taamaaliornikkut paasisstissat naqinneqarnerisa allannerat ima mikitiginissaat allaat atuarneqarsinnaanatik pinngitsoorniarlugu.

§28, imm. 1, imigassanik assiaqusersuinissamut piumasaqaatip atuuttup peerneqassaaq Imigassaq Ikiaroornartullu pillugit Siunnersuisoqatigiit inassutiginnigilaat imigassamik assiaqusersuinissamik piumasaqaateqarnerup peerneqarnissaa. Tamanna ilanngunneqarpoq inuiaqatigiinni imigassamik atuinerup annikillisinneqarnissaa siunertarlugu, tamatumalu kinguunerisaanik imigassap malitsigisaanik sunniutaasartut tassa uagut inuiaqatigiinni akiuuffigisagut. Maannakkut assiaqusersuinissamik piumasaqaataasup atuutsiinnarneqarneratigut nalunaarneqarpoq imigassaq meeqqanut aamma inuusuttunut 18-it inorlugit ukiulinnut naleqqutinngitsoq. Aammattaaq tamanna innuttasut akornanni atuinermik apparitsinermut tapertaasinnaavoq, tassami imigassaq takussaasoq tassaalluinnarmat nittarsaassineq. Imigassaq takussaaqqilerpat aamma niuertarfinni pissarsiariuminernerulerpat imigassap nioqqutigineqarnera annertusissaaq. Taamaattumik siunnersuisoqatigiit isumaqarput aalajangersakkanik suliaqartoqassasoq tassani niuertarfiit imigassaq imatut inissinneqassasoq, inissinneqarfia "pitsaanerpaatut" pinnani tassa imigassamik nioqquteqarneq annertusiniarlugu.

Imigassaq Ikiaroornartullu pillugit Siunnersuisoqatigiit inassuteqaatigaat Naalakkersuisut sulisutigissagaat imigassaq niuertarfinni ulluinnarni atugassanik pisiniartarfinnit peerneqavissasoq, aamma immikkut pisiniarfiit ammarneqassasut taamaallaat imigassanik nioqquteqartut nunani avannarlerni pissutsit assigalugit. Taamaattorli Danmarki tassani pineqannigilaq. Taamaaliornikkut sulisorineqarsinnaapput sulisut immikkut imigassanik tuniniaanermik ilinniarsimasut. Tamatuma amerlasuunik tuniniaqqitassanik pisinissaq ajornarnerulersissavaa aamma pasinartilissavaa aamma imigassarsiniarluni siuleriiaartarnerit ulluinnarni atugassanik pisiniarfiit silataanni takussaaajunnaassapput. Tamanna imigassamut tunngatillugu kulturimik allannqortitseqataasinnaavoq.

Assiaqusersuinerup atorunnaarsinneqarnissaa pillugu oqaaseqaatini siunniunneqarpoq pisiniarfiit namminneq aalajangissagaat assiaqusersuineq atuinnaassanarlugu. Imigassaq Ikiaroornartullu pillugit Siunnersuisoqatigiit siunnersuutigissavaat pisiniarfiit assiaqusersuinermik atuinnaartut aamma taamaaliornermikkut inuiaqatigiinni akisussaaqataanermik takutitsisut arlaatigut nersorniarneqassasut.

Akissuteqaat:

Imigassaq Ikiaroornartullu pillugit Siunnersuisoqatigiit oqaaseqaataannut akissuteqaat § 20,

imm. 4-mi piffissamat aalajangersarneqartumut tunngatillugu Kommuneqarfik Sermersuumut akissuteqaat matuma siulianiittoq innersuussutigineqarpoq.

Piffissat nioqquteqarfiusut illuartinneqarnissaat pillugu siunnersuut sivitsuinermit taarsiullugu allannguutissatut siunnersuummi matumani ilanngunneqanngilaq, oqaluuserisassami UKA 2018/53-imi Inatsisartut aalajangersaapput Naalakkersuisut siunnersuummik saqqummiussissasut, piffissat nioqquteqarfiusut sivitsorneqassasut ataasinngornermit arfininngornermit nal. 10.00 – 20.00-imut, tamannalu tusaatissatut tiguneqarpoq.

Imigassaq Ikiaroorartullu pillugit Siunnersuisoqatigiit imigassamik nittarsaassinermit tunngatillugu isummorsornerannut atatillugu Kalaallit Nunaanni Politiit tusarniaanermut akissuteqaataat matuma siulianiittoq takoqquneqarpoq.

Allannguutissatut siunnersuummi matumani § 28, imm. 2 peerneqarpoq ussasaarinermit inerteqquteqarnerup kingunerisaanik, taassuma kinguneraa nioqqutinik qanoq inissiinissamat sukumiinerusumik maleruaqqusat pillugit pisinnaatitsissut siunertaaruppoq.

Inatsisartut ullormut oqaluuserisassani UKA 2018/35-imi aalajangiiffigisassatut siunnersuut akuersissutigimmassuk assiaqusersuinissamat piumasaqaatip atorunnaarsinneqarnissaanut tunngatillugu, taava Imigassaq Ikiaroorartullu pillugit Siunnersuisoqatigiit niuertarfiit namminneq piumassutsiminnik assiaqusersuinermit atuutsitsiinnartut kajumissaaserneqarnissannut siunnersuutaat ilanngunniarneqarsimannngilaq. Matuma siulianiittumut ilassutitut imigassamik nioqquteqartarfinnik immikkut pisiniarfiliornissamat siunnersuut matuma allannguutissatut siunnersuutip avataaniittutut nalilerneqarpoq.

Pisiffik:

Pisiffimmi kissaatigaarput Kalaallit Nunaata aalakoornartortalimmik imigassartortarnerup annikillisinneqatigut kisitsisit kusanartut nangissagai, tamanna ukiuni +12-imi kingullerni ilisarnaataasimasoq. Isumaqartuarpuqut oqaloqatigiinneq aqqutissaasoq, soorlu aamma isumaqartugut paasisutissiisarneq Kalaallit Nunaannut iluaqutaanerussasoq, kiisalu meeqqat inuusuttullu imigassamik aalakoornartortalimmit sooq ussarnartorsiortinneqartarnerut misissueqqissaarneqarnissaa, tamatumalu kingornatigut tamanna allaavittut allanngortinnissaa. Islandimi aamma Europami nunat allat tamanna angusaqarfigilluarlugu ingerlassimavaat. Imigassamat aalakoornartortalimmut inatsit pillugu tusarniaanermut akissuteqaatigisatta siulia 31.05.2017-imeersoq innersuussutigaaarput.

Qilanaarisimavarput imigassaq aalakoornartortalik pillugu inatsimmut Naalakkersuisut immikkoortunut sisamanut allannguutissatut siunnersuutaasa tiginissaat, Inatsisartut tamarmiullutik 2018-imi ukiuunerani ataatsimiinnerminni akuersissutigisaata qasukkarneqarnissaa imaluunniit atorunnaarsinneqarnissaa.

Pisiffik inatsimmut allannguutissanut § 28 aamma 27 pillugit oqaaseqaateqarpoq.

Inatsisissatut allannguutissat § 28 pillugu uagut innersuussutigaarput § 28 inatsimmit peerneqarnissaa, taamaaliornikkut namminersorlutik inuussutissarsiuteqartut niuertarfiutaasa qanoq inissitsiternissaannut Naalackersuisut naalakkiinissaminut pisinnaatinneqassanngillat.

Inatsimmut atuuttumut allassimareersumut atatillugu § 28-mi imm. 2-mi niuertarfinni imigassap aalakoornartortallip sumi inissinneqarnissaanut aalajangersakkat sukumiinerusut isumaqanngilaq, assiaqusersuinermit qulakkeerneqarsimammat imigassap aalakoornartortallip takussaasuunnginnera. Uagut isumarput naapertorlugu Naalackersuit taamatut pisinnaatinneqarneq aalajangiusimaannarunikku imigassallu aalakoornartortallip takusaa neranut atatillugu immikkut tulluurtutut erseqqissarniarunikku, taava kissaatigiinnarpaat niuertarfiit qanoq pequsersorneqarnissaannut pissaaneqarnissamik attatiinnarnissaa, naak assiaqusersuinissamik inatsimmi piumasagaat peerneqaraluartoq.

Suliaqarfik imigassap aalakoornartortallip sumi inissinneqartarnissaanik piумаффигинеqarpat tamatuma niuertarfiup tamarmiusup pequsersorneqarnera sunnissavaa, tamannalu pisiniartartut akilissavaat – aammaarlutik. Pingaartuuvoq paasissallugu niuernermik suliaqarfik uagut niuertarfiutitsinnik pequsersuisarmat, tamanna pitsaanerussaaq piareersaneq aamma isumannaallisaaneq eqqarsaatigalugit. Ilaatigut imigassaq aalakoornartortalik tillissallugu pilerinartuuvoq, pingaartuuvorlu inissisimanissaa ajornaatsumik nakkutigineqarsinnaaniassammat, aamma sapinngisamik sulisut amerlanerpaat najugaanniinnissaa.

Nalilerparputtaa q maleruagassanik aalajangersaasoqarsinnaanngitsoq niuertarfinnit tamanit assigiimmik malinneqarsinnaasunik. Taamaattumik maleruagassat equngasumik eqquissapput, suliaqarfimmilu maannakkut unammillersinnaanerup equngassuteqarnera ingerlaannassalluni, pisiniarfiit maleruagassat malillugit assiaqusersuinermik tamarmik naammassinnissimanninnerat pissutaalluni.

§ 27 imigassamut aalakoornartortalimmut pilerisaarisarnermut inatsisitigut inerteqquteqarnerup qasukkarnissaa siunnersuut Pisiffiup isornartoqartippaa.

Naalackersuisut imigassaq aalakoornartortalik pillugu inatsisip allanngortinnissaanut siunnersuuteqaqqusivoq, taamaaliornikkut inatsimmi imigassat aalakoornartortalit pillugit qanoq ikkaluartumik ussasaaruteqartarnermut inerteqqussut atorunnaarsinneqassalluni imaluunniit ussasaaruteqartarnermut inerteqqussummik qasukkarnerusumik taarserneqarluni. Maannakkut siunnersuutaasup nammineq nittartagarisami immikkoortumi matoqqasumi ussasaaruteqartarnissamut periarfissiivoq. Tamanna soorunami qasukkaaneruvoq, kisianni uagut maluginiarparput aappassaaneerlugu oqallisigineqarnerani atorunnaarsinneqarnissaa

ilaasortanit innersuussutigineqartoq, marloqiusaasumik aaqqiissuteqartoqarsinnaanngimmat: Inerteqquteqassaaq imaluunniit inerteqquteqartoqassanngilaq.

Inuusuttut 18-it inorlugit ukiullit nittartakkap iserfiginissaanut inerteqquteqartoqarneq 100 %-imik qulakkeerneqarsinnaanngilluinnarpoq. Una siunertarisaq nunani arlalinni atuuppoq, nittartakkamut isertut saqqaanit ingerlaqqissagunik ukioq inunngorfitsik allaqqaarlugu aatsaat ingerlaqqissinnaassammata. Akornutaasooq ajornaatsumik qaangerneqarsinnaasooq, tamanna kissaatigineqarpat. Pisiffimmi atuisup aqqanik isissutissatullu ilisarnaammik atuisoqaraluarpalluunniit pinngitsoortissinnaanngilarput inuusuttut 18-it inorlugit ukiullit sallullutik isersinnaasarnissaat.

Oqaaseqaatigineqartuni atuarneqarsinnaavoq qasukkiinissamut siunnersuutigineqartoq ingammik najukkani nioqqutissiortunut iluaqutaassasooq. Tamanna takujuminaappoq, tassami takornariat najukkami nioqqutissiornermik ornitaminni nittarsaassinermik takusaqarnaviannngimmata. Uagut najukkani nioqqutissiortuutigit nittarsaassinissamut suli periarfissaqanngillat, ilaatigut Suluk imaluunniit takornariatitsiviit, nioqqutissiatik pillugu oqaluttualiorsinnaallutik – nittartakkamullu innersuussisinnaallutik.

Uagut paasisimasarput naapertorlugu unammillersinnaanermut equngassut allanngorani ingerlaannarpoq, assiaqusersuilluni nittarsaassinermut pisiniarfinni assiaqusersuinissamik piumasaaqatip peerneqarneranut akerliulluni:

Atuisartut imigassaq aalakoornartortalik takusinnaassavaat – taamaattorli aamma naamik. Tamatuma imminut akerliusoq sakkortuseqqippaa nioqqutit aalajangersimasut kikkunnit tamanit takuneqarsinnaallutillu aamma soorlu assersuutigalugu timersornermik ingerlatanut festivalinullu aningaasaliisuusarmata. Imigassamik aalakoornartortalimmik nioqqutissiortut amerlanerpaartaasa nioqqutimik aalajangersimasup saniatigut allamik pisariaqartitsinngillat suna pineqarnersoq kikkut tamarmik ilisimassappassuk.

Ataatsimut isigalugu taamaattumik meeqqat inuusuttullu ataasinnguamilluunniit ussasaarutinit imigassarlu aalakoornartortalik pillugu nittarsaassinermi assiaqusersorneqanngillat, nunarsuarmioqataanermilu taamaaliorneqarnaviaratik internetip aamma fjernsynip piviusumik taakkununga apuussisarmata.

Suli soqutigaarput imigassamik aalakoornartortalimmik nittarsaassisarneq pillugu oqaloqatigiinnissamut. Innersuussutigaarput siornatigut nammineq kajumissuseqarneq aallaavigalugu niuertarfiutillit energidrikkit nioqqutigineqartarnerat pillugu isumaqatigiissuteqarusussuseqarsimanerat. Aammattaaq suli soqutigaarput Naalakkersuisut suliaqarfii peqatigalugit periusissanik aalajangersaanissaat, ingasaassinaveersaarnissaq aamma katsorsartinnissaq aviisigut pisiniarfimmilu paasisutissiisarneq aqqutigalugit ingerlatitseqqisarniarluta.

Akissuteqaat:

Pisiffiup § 28-p tamarmi peerneqarnissaanut kajumissaarutaa tusaatissatut tiguneqarpoq, taamaammatt inatsimmi atuuttumi § 28 imm. 2 imigassap aalakoornartortallip niuertarfinni sumi inissineqarnissaanut maleruaqqusat sukumiisut pillugit Naalackersuisunik pisinnaatitsissummut tunngasoq atorunnaarsinneqarluni.

Siunnersuutip matuma unammilleqatigiinnermik equngasuutitsinera, pingaartumik takornarianut nittarsaassinermut tunngatillugu, Pisiffiup oqaatigisaa eqqarsaatigalugu siunnersuummi matumani ussassaareqqusaannginneq atorunnaarsinneqarmat taamatut nittarsaassisarneq periarfissaalissaaq.

Grønlands Erhverv Sulisitsisut:

Sulisitsisut (GE) imagassaq pillugu inatsimmut allannguutissatut siunnersuummut imatut oqaaseqaateqarniarput.

Nioqquteqarnermut unnukkut nalunaaqutaq arfineq pingasunut ullinnaat tamaasa sivitsorneqarnera GE-mit iluarisimaarneqarpoq. Tamanna UKA 2018-imi Inatsisartut aalajangiinerannut naleqqulluinnarpoq.

Akunnittarfiit aamma neriniartarfiit ammasarfii imaluunniit ulluni na. 03.00 tikillugu ammarsarfii Inatsisartunit isummerfigineqanngillat. Taakku imigassaq pillugu inatsisip kingullermik allanngortinneqarnerani annertuumik killilerneqarput.

GE-mit Naalackersuisunut inassutigineqassaaq akunnittarfiit aamma neriniartarfiit akuerineqassasut nal. 03.00-ip tungaanut ammasarnissannut ulluni nalliuttut siornatigut. Soorlu assersuutigalugu Sisamanngornerup Illernartup siornatigut aamma Qilaliarfiup kiisalu Ukiutoqqap siornatigut.

Allannguutissatut siunnersuummi § 1, immikkoortut 5, 6 aamma 7 peerneqartariaqarput, Inatsisartut aalajangersaanerannut naapertuutinnimmata.

Inuussutissarsiornermut Aatsitassanullu Ataatsimiititaliap isumaqatigiittup aalajangiiffisassatut siunnersuut taamatut saqqummiunneqarnermisut isikkoqartillugu ilalerpaat, tassani ussassaarisarnermut inerteqquteqarnerup atorunnaarsinneqarnissaa tunngaviuvoq.

Allannguutissatut siunnersuummi nassiunneqartumi ussasaarinnermik inerteqquteqarnermik atorunnaarsitsinngilaq, kisianni erseqqissaatigineqarpoq inatsimmut atuuttumut naleqqiussilluni qanoq unioqquutitsinerunngitsumik ussasaarisooqarsinnaanersoq. Inatsimmi atuuttumi matoqqasumik ussasaarisinnaaneq akuerineqarpoq.

Inatsisartut aalajangiinerat tassaavoq § 27-imik atorunnaarsitsinissaq § 1, imm. 5, 6 aamma 7-imik nassiunneqartumi allanngortitsinermut taarsiullugu.

Sulisitsisut imagassaq pillugu inatsimmut allannguutitut allanik oqaaseqaatissaqanngillat kisianni soorunalimi matuma siuliani oqaaseqaatigineqartut pillugit itisiliissuteqarnissamut piareersimavugut.

Akissuteqaat:

Tusarniaassuteqarnermi akissuteqaammi soorlu allasimasoq Inatsisartut aalajangiineranni akunnittarfiit aamma neriniartarfiit ammasarfii pineqanngillat, taamaattumik tamanna allannguutissatut siunnersuummi matumani sammineqanngilaq.

Sulisitsisut uparuarpaat allannguutissatut siunnersuut Inatsisartut aalajangiinerannut naleqqutinngitsoq. Naalakkersuisut Inatsisartut aalajangiinerannut aalajangersakkap pineqartup atorunnaarsinnissaanik imaluunniit qasukkarneqarnissaanut isummersorput. Tamatuma malitsigisaanik siunnersuummi aalajangersagaq atorunnaarsinneqarpoq.

Meeqqat pisinnaatitaaffii pillugit sullissivik MIO:

Meeqqat illersuisuata ulloq 18. december 2018 Imigassaq pillugu Inatsisartut Inatsisaata nr. xx., xx.xxx. 2019-imeersup allanngortinneqarnissaanut siunnersuut pillugu tusarniaassut tiguaa.

Meeqqat illersuisuat tusarniaanermut oqaaseqaateqarnissaminut periarfissinneqarnerminut qujalluni, innersuussutigineqarpoq Meeqqat Illersuisuata 24. maj 2017-imi tusarniaanermut akissutigisimasaa, aammattaaq Inuussutissarsiornermut Aatsitassarsiornermullu Ataatsimiititaliap saaffiginnissutaanut akissuteqaat 12. november 2018-imeersaq.

Taakku saniatigut Meeqqat Illersuisuat allanik oqaaseqaatissaqanngilaq.

Akissuteqaat:

Meeqqat Illersuisuata akissuteqaatigisamini innersuutigigaa Inuussutissarsiornermut Aatsitassarsiornermullu Ataatsimiititaliamut akissutigisimasani, tassani Meeqqat Illersuisuata tuaviupilunnertut isigaa Inatsisartut Inatsisaata akuersissutigineqarnerminut ukioq ataaserluunniit qaangiutinngitsoq allanngortinniarneqarmat. Tamatuma saniatigut Meeqqat Illersuisuata inassutigaa piviusunik tunngaveqarluni nalilersuineramik suliaqartoqassasoq, Inatsisartut Inatsisaata maannakkutut itsilluni anguniakkaminik eqqortitsinersoq aammattaaq allannguutit sunik kinguneqarsinnaanerannut tunngatillugu tunngaviusussanik.

Naalakkersuisut Meeqqat Illersuisuata isummersornera isumaqatigaat, tassa aalajangiinerit sapinngisamik tunngavissaqarluarluni aalajangerneqartarnissaat pillugu. Allannguutit piviusunngortinneqartut Inatsisartut aalajangersaanerannik tunngaveqarput tassami

nalileramikku allannguutissatut siunnersuutigineqartut pisariaqartuusut.

Siunnersuummi aalajangersakkanut ataasiakkaanut oqaaseqaatit*§ 1-imut*

Nr. 1-imut

Meeqqat inuusuttullu 18-it inorlugit ukioqartut sassaalliteqartarfinni isersimasinnaanerat sivitsorneqarpoq nal. 20.00-imit nal. 23.00-imut taamaalilluni, cafeeni piffissami tassani isersimasinnaaneq pisinnaalerluni inersimasumik 18-it sinnerlugit ukioqalereersimasumik ingiaqateqarnani pisinnaangorluni. Manna tikillugu piffissaliunneqartoq nal. 20.00-limut tulluannigitsutut nalilerneqarpoq meeqqat inuusuttullu 18-it inorlugit ukioqartut cafeeniinissaminnut periarfissaqarnissaannut naleqqiussilluni. Cafeeni avatangiisit nalilerneqarput imaangitsutut meeqqat inuusuttullu 18-it inorlugit ukioqartut taakkunani isersimanissaminnut illersorneqartariaqarlutik. Imerniartarfinni isersimanermut tunngatillugu § 32 maluginiaqquneqarpoq.

Sassaalliteqartarfinni isersimasut isersimasinnaanerat aalajangersakkami malittarisassiorneqarpoq. Tassa siunertaangilaq inatsisini allani inatsisitigut pisinnaatitaaffiit allangortinneqarnissaat, soorlu assersuutigalugit sulisunut tunngasut Kalaallit Nunaanni sullivimmi avatangiisinut inatsit naapertorlugu inuusuttut piffissaq suliffissaannut il.il. tunngasut.

Nr. 2-mut

Imigassanik aalakoornartortalinnik tuniniaanermut piffissaliussaq sivitsorneqarpoq imaalillugu ataasinngornermiit arfininngornermut nal. 10.00-imit 20.00-imut tuniniaasoqarsinnaasunngorlugu. Taamaammatt imigassanik aalakoornartortalinnik tuniniaaneq piffissami siviisunerusumi pisinnaangussaaq taamaaliornikkut innuttaasut ulluinnarni pisiniartarnerminni periarfissagissaarnerulissallutik.

Nr. 3-mut

Imigassanik ussasaarinerмик inerteqquteqarneq maannakkut atuuttut atorunnaarsinneqarpoq, taamaattumik § 27-imut immikkoortumut qulequtaq peerneqassaaq.

Nr. 4-mut

Inatsisartut Inatsisaanni imigassanik ussasaarinissamut inerteqquteqarneq siunnersuummi matumani atorunnaarsinneqarpoq. Inatsisartut 2018-imi ukiakkut ataatsimiinnerminni aalajangerpaat ussasaarinermut inerteqquteqarnerup qasukkarneqarnissaa imaluunniit atorunnaarsinneqarnissaa. Tusarniaanerup naanerata kingornatigut ussasaarinermut inerteqquteqarneq siunnersuummi atorunnaarsinneqarpoq, tassani siunertarineqarpoq pilerisaarinerup aamma ussasaarinerit allat akuerineqarnissaat, aammattaaq unammilleqatigiinnerup equngassuteqarnera pinngitsoorniarlugu.

Imigassanik aalakoornartortalinnik ussassaarineq aamma maleruaqqusat tamatumunnga tunngasut inatsimmut allamut attuumassuteqarput, tamatumunnga ilaavoq nittarsaassisarnermut inatsit, tassanittaaq ussassaarinermi meeqqat inuusuttullu illersorneqarnerat ilaalluni.

Nr. 5-imut

Imaammat § 28 atorunnaarsinneqarluni immikkoortumut qulequtaq tassunga attuumasoq peerpoq.

Nr. 6-imut

Aalajangiiffigisassatut siunnersuutip akuersissutigineqartup malitsigisaanik § 28 tamakkerlugu atorunnaarsinneqarpoq, imm. 1 ilanngullugu, tassani pineqarpoq niuertarfinni assiaqusersuineq. Taamaalillutik piniarfiit pisussaaffeqarunnaarput imigassanik aalakoornartortalinnik assiaqusersuinissaminut. Pisussaatsitsinermik aalajangersagaq § 28, imm. 2 niuertarfinni imigassat aalakoornartortalit sumut inissinneqarnissaannut tunngasoq atorunnaarpoq § 27-imi ussassaarinissamut inerteqquteqarnerup atorunnaarsinneratigut.

Nr. 7-imut

Imm. 2-mut

Siunnersuutip matuma tusarniaassutigineqarneranut atatillugu Kalaallit Nunaani Politiit tikkuarpaat § 32, imm. 1-imi peqqussummik tunniussinissamik piginnaatitsissut eqqortissagaanni taava pisariaqartoq imerniartarfinni piginnittut aamma aqutsisut inuit taamatut peqquneqarsimasut pillugit paasissutissanik pigisaqartariaqartut.

Taamaattumik § 32-imi aalajangersagaq ilanngunneqarpoq politiinut paasissutissanik ingerlatitseqqinnissamut piginnaatitsissut. Paasissutissat tunniunneqarsinnaasut taamaallaat tassaapput ateq aamma CPR-normu kiisalu inerteqquteqarnerup qanoq sivilissuseqarnera. Pissutsit piviusut pillaatissinneqarnermut tunngasut inerteqquteqarnerup ingerlateqqinneqarnissaannut tunngaviupput.

Taamaalillutik paasissutissat ingerlateqqinneqartussat tulluartsuussapput aamma taakkununnga ilanngunneqassanngillat inerteqquteqarnerup eqqortinneqarnissaanut atorneqartussat sinnerlugit. Paasissutissat inunnut tunngasut ingerlateqqinneqarnissaannut tunngasut peqarmata paasissutissat inunnut tunngasut suliarineqartarnerat pillugu inatsit innersuuneqarpoq, tamatumunnga ilanngullugu paasissutissanik suliaqarnermi ileqqorissaarnissaq.

Nr. 8-mut

Imm. 3-mut

Paasissutissat inunnut tunngasut taamaallaat inunnut aalajangersimasunut immikkut eqqaaneqartunut tunniunneqarsinnaapput, inerteqquteqarnerup eqqortinneqarnissaanut

tunngatillugu paasissutissat pisariaqarmata. Taamaattumik suliarinnineq taamaallaat pisinnaavoq paasissutissanik inunnut atassuserneqarsinnaasunik pissarsinissamut tunngavissiorsinnaagaanni.

Imm. 4-mut

Inuit paasissutissanik pissarsisut tak. imm. 2 nipangiussisussaataapput, taamaattumik paasissutissat pissutissaqanngitsumik ingerlateqqinneqassanngillat. Pissutissaqanngitsumik ingerlatitseqqinneq iliuuseqarfigineqarnermik kinguneqassaaq. Pissutissaqartitsineq sakkortunerussaaq ingerlatitseqqinneq imaluunniit taakkuninnga atuineq piaaraluneerluni pippat nammineq imaluunniit allanik iluaqutissarsiniarnikkut, imaluunniit pissutissaqartitsineq allamik immikkut sakkortunerusumik ilaqarpat.

Imm. 5-imut

Naatsorsuutigineqarpoq maleruaqqusanik aalajangersaasoqassasoq ilisimatitsinerup allakkatigut pinissaanut tunngatillugu allakkat nalinginnaasut imaluunniit tammarnaveeqqusikkat atorlugit, imaluunniit e-post illersugaq aqutigalugu.

Naalakkersuisut ilaatigut aalajangersakkami piumasaqaatigisinnaavaat sassaalliuteqartarfiup paasissutissanik pissarsiaminnik toqqorsinissaat aamma suliarinninnissaat, tamatumunnga ilanngullugit piginnittup aamma aqutsisup suliffeqarfimmi paasissutissat sulisunut sorlernut ingerlateqqissinnaaneraat tassa kikkunnut imm. 5-imi immikkut taaneqareersimasut saniatigut, tassani pineqarsinnaapput barini sulisut aamma sulisut sassaalliuteqarnermik suliaqartunut.

Nr. 9-mut

§§ 27-ip aamma 28-ip atorunnaarsinneqarnerisa kingunerisaanik taakkununnga innersuussutit § 43-mi imm. 1-imiittut peerneqarput.

§ 2-mut

Aalajangersakkami Inatsisartut Inatsisaata atuutilersinneqarnissaanut piffissaliussaq allassimavoq.